

**VENDIM**  
**Nr. 242, datë 19.4.2019**

**PËR AUTORIZIMIN E AVOKATURËS SË SHTETIT PËR KRYERJEN E  
PROCEDURAVE TË KONTRAKTIMIT TË SHËRBIMIT TË KONSULENCËS PËR  
MARRËVESHJEN E KONCESIONIT TË LIDHUR ME SHOQËRINË “TIRANA  
INTERNATIONAL PARTNERS” SHPK, PËR AEROPORTIN NDËRKOMBËTAR  
“NËNË TEREZA”, RINAS, TIRANË, SI DHE PËRCAKTIMIN E PROCEDURËS  
PËRKATËSE TË PËRZGJEDHJES**

Në mbështetje të nenit 100 të Kushtetutës, të shkronjës “c”, të nenit 7, të ligjit nr. 9643, datë 20.11.2006, “Për prokurimin publik”, të neneve 15, pika 8, e 18, të ligjit nr. 10018, datë 13.11.2008, “Për Avokaturën e Shtetit”, të ndryshuar, dhe të nenit 13, të ligjit nr. 99/2018, “Për buxhetin e vitit 2019”, me propozimin e Kryeministrit, Këshilli i Ministrave

**VENDOSI:**

1. Autorizimin e Avokaturës së Shtetit për kryerjen e procedurave të kontraktimit të një zyre avokatie të huaj për shërbimin e konsulencës për marrëveshjen e koncesionit të lidhur me shoqërinë “*Tirana International Partners*” sh.p.k., për aeroportin ndërkombëtar “Nënë Tereza”, Rinas, Tiranë, si dhe përcaktimin e procedurës përkatëse të përzgjedhjes sipas kushteve e afateve këtij vendimi.

2. Kontraktimi i zyrës së avokatisë së huaj do të realizohet nëpërmjet procedurës konkurruese dhe transparente përzgjedhëse.

3. Me hyrjen në fuqi të këtij vendimi, Avokati i Përgjithshëm i Shtetit miraton urdhrin për ngritjen e komisionit të kryerjes së procedurës përzgjedhëse të zyrës së avokatisë së huaj për shërbimin e konsulencës për marrëveshjen e koncesionit të lidhur me shoqërinë “*Tirana International Partners*” sh.p.k., për aeroportin ndërkombëtar “Nënë Tereza”, Rinas, Tiranë, duke përcaktuar në të:

a) nevojën e kontraktimit bazuar në kërkesat e ardhura nga Ministria e Infrastrukturës dhe Energjisë dhe Ministria e Financave dhe Ekonomisë;

b) kushtet e veçanta që duhet të plotësohen nga zyrat e avokatisë;

c) kriteret e përgjithshme që duhet të plotësojë një zyrë avokatie për t’u bërë pjesë e procedurës konkurruese, si më poshtë vijon:

i. Ekspertiza dhe specializimi i zyrës së avokatisë në fushën e objektit të çështjes për të cilën është vendosur fillimi i procedurës së kontraktimit;

ii. Numri i rasteve të suksesit në raste të ngjashme;

iii. Besueshmëria dhe reputacioni;

ç) objektin e punës/llojin e shërbimeve të kërkuara;

d) përbërjen e komisionit prej të paktën 3 (tre) anëtarësh, një prej të cilëve është kryetari.

dh) detyrat kryesore të komisionit, si më poshtë vijon:

i. Kryetari i komisionit mbledh menjëherë komisionin, pas hyrjes në fuqi të urdhrin të Avokatit të Përgjithshëm të Shtetit, të përcaktuar në pikën 3, të këtij vendimi, dhe vendos për hartimin e dërgimin e ftesës për ofertë disa zyrave të avokatisë të huaja, të renditura të parat në një ose disa nga guidat e renditjes avokatore, si: “*Chambers & Partners*”, “*Legal 500*”, “*Who’s Who Legal*”, si dhe bën njoftimin për ftesë për ofertë në faqen zyrtare të internetit të Avokaturës së Shtetit. Si ftesa për ofertë, ashtu edhe njoftimi në faqen zyrtare, do të jenë në gjuhën shqipe dhe në atë angleze.

ii. Ftesa për ofertë, adresuar zyrave të avokatisë, duhet të përmbajë, të paktën, objektin e kontratës, detyrat e të kontraktuarit, kriteret e përgjithshme e të veçanta që duhet të plotësohen nga ofertuesi, kohëzgjatjen e kontratës, pikëzimin e kriterëve vlerësuese, vendin dhe afatin e dorëzimit të ofertës (datë/orë/vit), si dhe të drejtën e ankimimit.

iii. Njoftimi për ftesë për ofertë në faqen zyrtare të internetit të Avokaturës së Shtetit duhet të përmbajë, të paktën, autoritetin kontraktor dhe adresën e tij, objektin e kontratës, kohëzgjatjen e kontratës, vendin dhe afatin e dorëzimit të ofertës (datë/orë/vit), personin e kontaktit të autoritetit kontraktor dhe mënyrën e komunikimit me të.

iv. Komisioni pret ofertën brenda afatit të përcaktuar në ftesën për ofertë dhe, në çdo rast, jo më vonë se 5 (pesë) ditë pune nga data e publikimit të njoftimit të ftesës për ofertë.

v. Pas përfundimit të afatit të përcaktuar në nënndarjen “iv”, komisioni merr në dorëzim, hap dhe administron njëkohësisht, në prani të anëtarëve të komisionit, në një ditë të vetme, ofertat e paraqitura nga zyrat e avokatisë, të specifikuar në to çmimin përkatës për kryerjen e shërbimeve, së bashku me dokumentacionin përkatës tekniko-ligjor, që vërteton plotësimin e kriterëve të veçanta e të përgjithshme të zyrës, të gjitha këto, të dorëzuara, të mbyllura në zarf.

vi. Pas hapjes së ofertave, komisioni, brenda ditës, analizon ofertat e paraqitura nga zyrat e avokatisë të huaja dhe kontrollon paraqitjen e dokumentacionit përkatës tekniko-ligjor, që vërteton plotësimin e kriterëve të veçanta dhe të përgjithshme të zyrës, me qëllim kualifikimin e tyre, dhe, pas renditjes së zyrave të kualifikuara, përzgjedh zyrën që vlerësohet më tepër.

vii. Pas përfundimit të procedurës përzgjedhëse, komisioni harton një raport të hollësishëm për të gjithë procedurën e ndjekur, zyrat e avokatisë të huaja, që kanë marrë pjesë, zyrën e avokatisë të përzgjedhur, të cilin ia paraqet Avokatit të Përgjithshëm të Shtetit, së bashku me klasifikimin përfundimtar të zyrave të avokatisë pjesëmarrëse, sipas pikëve përkatëse.

4. Avokati i Përgjithshëm i Shtetit, në bazë të renditjes së dhënë nga komisioni, vendos brenda ditës nga data e paraqitjes së relacionit dhe njofton zyrtarisht zyrën e avokatisë të listuar të parën për vijueshmërinë e procedurave për negociimin e kontratës së shërbimit, si dhe Ministrinë e Infrastrukturës dhe Energjisë dhe Ministrinë e Financave dhe Ekonomisë për përzgjedhjen e zyrës së avokatisë.

5. Në rast të tërheqjes nga oferta të zyrës së përzgjedhur brenda 3 (tri) ditëve kalendarike, Avokati i Përgjithshëm i Shtetit i dërgon njoftim zyrës së avokatisë, e renditur e dyta nga komisioni.

6. Ofertuesit, jo të parët në renditje, mund të ushtrojnë të drejtën e ankimit lidhur me procedurën e kualifikimit brenda 3 (tri) ditëve pune nga data e njoftimit të tyre nga Avokati i Përgjithshëm i Shtetit. Ankesat për procedurën e kualifikimit paraqiten, në çdo rast, me shkrim dhe i drejtohen Avokatit të Përgjithshëm të Shtetit. Për shqyrtimin e ankesës, Avokati i Përgjithshëm i Shtetit krijon një komision me jo më pak se 3 (tre) anëtarë të ndryshëm nga komisioni i përcaktuar në pikën 3, të këtij vendimi, për shqyrtimin e menjëhershëm të ankesës brenda ditës. Po brenda ditës, pas marrjes së raportit të këtij komisioni për shqyrtimin e ankesës, Avokati i Përgjithshëm i Shtetit shprehet lidhur me ankesën dhe njofton menjëherë ankuesin me shkrim.

7. Pas përfundimit të procedurës së ankesave, Avokati i Përgjithshëm i Shtetit negocion dhe nënshkruan kontratën me zyrën e avokatisë të huaj të përzgjedhur sipas procedurës së mësipërme në emër të Ministrisë së Infrastrukturës dhe Energjisë dhe Ministrisë së Ekonomisë dhe Financave për kryerjen e shërbimeve.

8. Pas nënshkrimit të kontratës, Ministria e Infrastrukturës dhe Energjisë dhe Ministria e Ekonomisë dhe Financave angazhohen në mbështetjen dhe vënien në dispozicion të kontraktorit të të gjithë aksesëve të nevojshme në terrene dhe në dokumentacion mbi bazë të kontratës.

9. Pas nënshkrimit të kontratës dhe hyrjes në fuqi të saj, Avokati i Përgjithshëm i Shtetit merr masa për të pajisur zyrën e avokatisë të huaj të përzgjedhur me autorizimet përkatëse për kryerjen e shërbimeve.

10. Avokati i Përgjithshëm i Shtetit cakton, me urdhër, një avokat shteti për ndjekjen e zbatimit të kontratës deri në përfundim të saj, i cili do të ketë kryesisht funksione mbikëqyrjeje, koordinimi dhe komunikimi me të kontraktuarin.

11. Kostot financiare (kryerja e pagesës së çmimit të kontratës për të kontraktuarin - zyrën e avokatisë të huaj) do të përballohen nga fondi rezervë i buxhetit të shtetit, bazuar në kushtet specifike që do të përcaktohen në kontratë.

12. Ngarkohen Avokatura e Shtetit, Ministria e Infrastrukturës dhe Energjisë dhe Ministria e Ekonomisë dhe Financave për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTËR

**Edi Rama**